

সংসারস্থ করেছি বরণ,  
তবু তুমি মম জীবনস্বামী ॥  
না জানিয়া পথ ভ্রমিতেছি পথে,  
আপন গরবে অসীম জগতে ।  
তবু স্নেহেনেত্র জাগে প্রবতারা,  
তব শুভ আশিস্ আসিছে নামি ॥

শুভ্র আসনে বিরাজ অরুণ-চটামাবে,  
নীলাম্বরে ধরণীপরে  
কিবা মহিমা তব বিকাশিল ।  
দীপ্ত সূর্য্য তব মুকুটোপরি,  
চরণে কোটি তারা মলাইল,  
আলোকে প্রেমে আনন্দে  
সকল জগত বিভাসিল ॥

আচ্ছ অস্তরে চিরদিন, তবু কেন কাঁদি ।  
তবু কেন হেরি না তোমার জ্যোতি,  
কেন দিশাহারা অন্ধকারে ॥

অকূলের কূল তুমি আমার,  
তবু কেন ভেসে যাই মরণের পারাবারে ।  
আনন্দঘন বিভু, তুমি যার স্মার্মা,  
সে কেন ফিরে পথে দ্বারে দ্বারে ॥

---

আজি হেরি সংসার অমৃতময় ।  
মধুর পবন, বিমল কিরণ, ফুল্ল বন,  
মধুর বিহগকলধ্বনি ॥  
কোথা হ'তে বহিল সহসা প্রাণভরা প্রেমহিল্লোল, আহা,  
হৃদয়কুসুম উঠিল ফুটি পুলকভরে ॥  
অতি আশ্চর্য্য, দেখ সবে দীনহীন ক্ষুদ্র হৃদয়মাঝে,  
অসীম জগতস্বামী বিরাজে স্তম্ভর শোভন ।  
ধন্য এই মানব-জীবন, ধন্য বিশ্ব-জগত,  
ধন্য তাঁর প্রেম, তিনি ধন্য ধন্য ॥

---

আনন্দধারা বহিছে ভুবনে,  
দিনরজনী কত অমৃতরস উথলি যায় অনন্ত গগনে ॥  
পান করে রবি শশী অঞ্জলি ভরিয়া,  
সদা দীপ্ত রহে অক্ষয় জ্যোতি,  
নিত্য পূর্ণ ধরা জীবনে কিরণে ॥